

hlipahluaili tamu'u

maci miungu taluavaulana ari, malialikihlia ina'ana ihlahlamu puaili miararuma, angahli miararuma ikatumahlana, ausua pakiaturua, umiasala tapiamaliahlua kikucu, tapicunguhlu usua hliarikuruta sala'a, angahli rumariringi miararuama miungu pi umani kuli'i ahlamu miararuma, nani ia saliaisa tamu'u.

mucapi likihli macacaca tamu'una, tarucuvungu ihlahlamu, mitahlahluamu arupariva tamu'una, marumukuatamu'una kumikihli ihlahlamu apacaca ihlahlamu. salia 'avangana tamu'una ia ma marikisua, naana ia paranaisa taku'i'iaru, ihlaisa paranahlamu ukikirimi anau pahlivinga, naana matumuhlua hliaripucua tamu'una pahlivinga kiariari, marumukuaku pakisuahlai tamu'u: ngahlaisa kani'i? ngahlaisa kana'a? umarua karitahlana tamu'una tumuru ihlaku, makuvaaua hlikicumia lika'a "umanacu uuru", usuanganaiu pahlasurucua tamu'u ahlaina, maruamu vahlita kumatalakiahlu upiaini camai marupatuku apuhlu masunguli, tulusu ucani pihlingi uumu uuru, tam masasangaru arumukaku. kulupungu uumu uuru, tulukuluku mamua tupuru apuhlu, umahlikua tamu'una ihlahlamu macaca amihla, tamucumu kani'i mahluavacavacangu, akuku umaria kasukasumana ia, rianuamu hlikirapangacu uka'aka tukapu, maivuvurunga kuna arasihlangu umacukacu, pasa'asi tasuhlatua hla curu, luvucu ia

tasuhlatuahlamu! muasasala usua pakiaturua iniciki miungu ariatukurana, kumamahlipapu marucavu hlikaialanguaisa inaku curu, mapuhlii uuru hlipahlahlapa hlatungu ritu'a hla ucani 'asaru, kana'a ia mataingalicu mavacangu sikuamamahlipapu, maci ku aunana ia mairangu hla intavangu.

miungu umalilupungu ia, makacaniaku puaili, ta'iaraisaka matumuhlua ta'iaraku ma salia, ahlukua taku'i'iaru, miungu salia pasautasuhlatua musa hlipatuaiailia matapangu kalavungu 'ukui, muhluhlu sala'a ahlahluahlusu papucukiu'u palumuhlu piapipuaili, miungu salia pahlalangua ina'ana kuaruvaruvana, pusipiakuapuhlu patucici sahlumu, upapalu hlipasalangulangu ama'a puaili, miungu ruvana, tamalungalu hla tamPaliku, marumuku ukikirimi amaku, takuliliungu arupakakari, marumukuaku nua hlahlahlamama, tupuru patuku apuapuhla, kumita hlakana'ana takuhlahluahlusu, tumamahlungu pahlivinga kiariari hla kisuahlahlama, aunanicu micalivi ucani aari.

amihlamana tamu'una, kumita ihlamu hlamuhlamua, kui'arahlasu aanu hla pahlivinga, rianu miahlivihlivi, tumuakia pimanau kukia paranasu, pasamamanganuaku malitatanulu, tumimahla karitamu'u akuisa mamainimana tamuucu hlipasalangulangu, macuisa ihlata kani'i tamucuita hlimahluvacavacangu.

外公的回憶

週末媽媽開著車載我們回故鄉，外公笑著迎接我們，外公喜歡騷我們癢，逗得我們哈哈大笑。外公的房間在二樓，那是他的工作室，更是我們最愛尋寶的地方，那裡收藏很多東西，外公會用母語教我。樓下傳來「吃飯了」，一家人在庭院吃飯，圍著火坐著，外公聊起國小打赤腳，走三小時到學校，中午的便當只有白飯、炒酸菜和一顆荷包蛋的情景，外公要我們要好好珍惜，不可以浪費，聽到外公小時候的生活艱辛，覺得我們好幸福。